

四庫全書

子部

欽定四庫全書

子部

普濟方卷三百五十九

詳校官太醫院吏目_臣吳尊變

編修_臣倉聖脈覆勘

總校官進士_臣繆琪

校對官中書_臣朱忻

謄錄舉人_臣曹勲祖

欽定四庫全書

普濟方卷三百五十九 明 周王朱櫛 撰

嬰孩門

五臟伏敵喜傷

附論

肺所伏者心所敵者肝所喜者辣所傷者焦苦二變七
蒸之臟和則喜歡氣爽神清魄強疾主喘滿欬傷
風作熱虛痰壅盛

腎所伏者脾所敵者心所喜者鹹所傷者甜五變十蒸

之臟和主行坐嬉戲笑語疾主崩砂黑齒截齒咬
牙疳耳膿汁

肝所伏者肺所敵者脾所喜者酸所傷者辣辛初變六
蒸之臟和則魂神壯意志生疾主風攣搐搦眼目
瘰赤疼痛

心所伏者腎所敵者肺所喜者苦所傷者鹹三變八蒸
之臟和則情性悅樂疾主驚癇恐悸虛躁啼呌譊語
狂煩涎流口角

脾所伏者肝所敵者腎所喜者甜所傷者酸醞四變九
蒸之臟和則消穀氣美飲食疾主嘔噦疳積虛痢痞
癖潮熱不思乳食

五位分部定位

附論

肺部所主鼻孔井竈尖處名準兩眼大角中央坎陷名
曰山根若鼻孔黑如煤色主肺焦熱或黑燥如墨色
主肺氣已絕鼻中赤瘡疳盛或瀉白涕主肺寒或因
寐流清涕主傷風肺熱或鼻塞呼吸艱澁有妨吮乳

關竅閉塞乃感冒風寒邪熱之候鼻下生瘡潰爛者
即疳鼻中常臭者積熱所致

腎部所主耳穴之前名曰耳花耳船名輪輪裏名廓輪
廓焦黑腎家虛熱其黑如炭腎絕待旦耳門生瘡衛積
非常耳中膿出腎熱疳極臭名停耳膿汁不止瘡癢
如裂其候虛熱耳聽不聰心腎氣壅常作關關熱氣
上攻或如蟲剖榮虛衛熱耳輪如水痲痘相侵耳輪紅
熱傷寒是則極熱內痛腫氣相攻清心涼膈關竅通

塞兒孩兩腎常虛无病若有攻擊使令無益

肝部所主眼睛有穴內藏其神外究五輪眶眇屬脾熱
即生眇兩眇屬心熱痛如針白屬肺家熱赤生砂
黃屬肝臟昏翳腎障中心瞳人腎熱不明兒孩眼目
痛即便哭良方對治更為忌毒或患丹瘡從裏為殃
經效良藥速療無妨眼本屬肝怕熱怯寒如有治法
得愈何難眼或連眇驚風交雜忽然竄視驚風已至
肝熱定睛或翻無神瞳出中隔十無一生

脾部所主唇即口門語言之明舌居其中飲食之宗齒
牙咀嚼咽喉相約牙齒既剛角宮自若嬰孩未定唇口
見病上則人中下乃承漿上下四旁皆屬脾鄉口內屬
心心脾有熱舌燥唇裂三焦蘊熱紅如血色紅重渴輕
即流涎沫鵝口膜口木舌重舌脾肺熱就口內噴臭脾
腎氣寒色如死肝大驚一嚇口乾唇白時時積驚漸
漸傳心心氣不足令兒煩哭可知脾絕指甲皆黑目
神無光醫者知亡五種撮口驚風最惡可醫論方

無路莫錯

心部所主眼睛直下高骨之中名之曰顴顴下名面面下
名頤屬生則吉相反病垂相尅證失醫士喜之平常
不動良士惡之其色反垂應病垂色九分不救心絕
何因大叫數聲過閔不作必作鴟聲夫人一身主事
于心心不可病病即散神兒童心真纔熱傷神神既
昏亂當與調榮心為身主常能安靜忽然加熱譫譫
驚汝邪干不寧心常昏沉醫工究心藥莫亂陳人之

五體以頭為首首中有面面中有睛睛中有神神者
目中光彩是也或隱或顯或橫或衝應衛而現病之
順即順疾之逆即逆色者青黃紅白黑是也初發
則我生而侵之次則生我以臨之盛則我尅以交之
重則尅我而入之侵即有犯臨即相干交即過位入
即通度然其白色者白似枯骨又如烟霧空黑色者
如冷灰又如竈尾塵埃紅色者紅若朽木又若赤霞
照谷黃色者黃似晒竹又如敗葉紅霜青色者青如冬

瓜又如荷葉蓋水窾之侵臨交入究之生平尅傷加
以聽聲而應之一數圓長謂其如水洄渦漩洑流聲
也二數銳謂如焚薪爆烈之聲也三數散輟謂其如
朽腐折蠹之聲也四數洪亮謂其如鍾磬之器擊響
之聲也五數頽弊謂其有如牆傾岑陷崩塌之聲也
在病疾而有變于證而有應五行五脈一氣而更有
滯者從幼至長氣干犯者隨受以傳或善或惡惟主
五臟相叅百脉相領輕重相傳自然應見

辨小兒脈法

分三部法

分三部但取掌後高骨為關關前為寸口關後為尺
澤如小兒脈可以一指按其三關進退取之此法
甚明不須疑惑也

論小兒脈

小兒脈三歲以上五歲以下然後可看與大人有
異者為呼吸常六至是也八至病十至困蓋小兒

純陽故脉息數促如大人者為不同也小兒周歲
以前脉息難憑周歲以後方有脉形寶鑑云五百
七十六日乃成人血脉骨肉皆堅牢方可診候也
審脉逆順

驚悸脉

浮數順沉細逆
身溫順身冷逆

夜啼脉

微小順洪大逆
身冷順身熱逆

心腹痛

沉細順浮大逆
身溫順身冷逆

傷寒脉

洪弦順沉細逆
浮大順微伏逆

汗後脉

沉細順緊促逆
困倦順狂躁逆

溫病脉

洪大順沉細逆
身熱順身冷逆

咳嗽脉

滑浮順沉細逆
身溫順肢冷逆

霍亂脉

浮洪順沉微逆
身溫順身冷逆

吐衄脉

身浮大順沉細逆
身溫順身冷逆

泄瀉脉

身緩小順浮大逆
身溫順身冷逆

諸痢脉

身沉細順浮大逆
身溫順身冷逆

諸渴脉

身洪數順微細逆
身溫順身冷逆

諸腫脉

身滑大順沉細逆
身溫順滑泄逆

腹脹脉

身浮大順虛小逆
身溫順泄瀉逆

痰喘脉

身滑大順沉細逆
身溫順身冷逆

寒熱脉

身緊急數順沉細逆
身溫順強直逆

疳勞脉

身緊急數順沉細逆
身溫順脾泄逆

蟲痛脉

身滑緊急順浮大逆
身溫順唇青逆

諸失血

身沉細順浮數逆
身溫順發熱逆

中惡腹脹

身緊急數順浮大逆
身溫順身冷逆

黃疸脉

身浮大順沉細逆
身溫順泄瀉逆

火瘴脉

身浮洪順沉細逆
身熱順身冷逆

已上脉是小兒五臟之根本若得其順則知其可治

若得其逆則知其不可治也縱有生者十無一二

七表應病

浮

寸口風熱頭沉關上腹脹胃痛尺中大便不通

衄

寸口衄血吐血關上瀉血痢血尺中少便出血

滑

寸口惡心吐逆關上胃寒不食尺中渴飲不歇

實

寸口胃中煩熱關上腹滿痛切尺中小便淋瀝

弦

寸口胃心結痛關上胃寒不食尺中小便赤澀

緊

寸口頭疼心痛關上腹內刺痛尺中小便急痛

洪

寸口頭痛壯熱關上吐逆不食尺中小便赤澀

三部一脈

三部俱數

身熱驚搐
忪喝心躁

三部俱緩

脾熱口臭
吐逆寒熱

三部俱弦

肝風拘急
欲發驚搐

三部俱浮

心腹疼痛
急則驚癇

三部俱芤

又虛瀉血
吐血瀉血

三部俱洪

發熱驚悸
大小便秘

三部俱實

胃不能食
胸膈不利

三部俱急

巢氏云主
小兒驚癇

脉應雜病

數

為熱
屬腑

遲

為冷
屬臟

陽數

主逆吐不
吐必發熱

陰微

主泄瀉不
瀉必盜汗

沉數

寒熱寒多熱
少亦生骨蒸

緊數

寒熱熱多寒少
又主骨蒸急

沉緊

心腹

疼痛短數同又
主咳嗽有疾

沉細

乳食不化亦
主疔痛不利

沉伏

為積聚
為霍亂

微緩

泄瀉乳不
化沉緩同

微澁

痰癰筋攣
微主利血

微急

寒熱
吐血

微浮

嗽

浮滑

宿食不消亦主咳嗽

浮緊

疰氣耳聾

弦緊

潮痛

浮弦

頭痛身熱

浮數

驚熱

緊滑

吐血惡心

心急數

驚癇不測屢主疰淋

肺甚緊

顛癇風癇痰涎流溢

肺浮實

鼻塞大小便不通

脾微細

吐不

則瀉難治

關緊滑

主蛔蟲尺沉同

尺微細

瘧泄冷利乳食不化

尺微

澁

便血無血必盜汗

脉過寸口入魚際

主遺尿

七表八裏脉乃是五臟六腑脉也蓋小兒純陽有病多

見七表脉為屬陽脉故也主病有驗八裏脉所以不

見者為屬陰脉故也設是小兒有八裏脉者必發陰

痼孫氏云陽脉急甚必變陽痼急驚風也陰脉沉遲必變陰痼是慢驚風也是以八裏多不經見

湯氏云凡脈浮數為熱風伏結為寒沉細為冷傷食亦沉大小不均者惡也○小兒脈大多風熱沉細因云乳食結弦長多是肝腸熱緊數驚風四肢掣浮洪胃口似火燒沉緊腹中痛不徹虛瀉有氣又驚驚脈芤多利大便血前大後小童男順前小後大必氣咽四至洪末苦煩滿沉細肚中疼切切滑主露濕冷所傷弦急客忤分明說五至夜甚浮大晝六至夜細浮晝別息數平和八九至此是皆人之惡疾前件所論童男脈訣乃舊訣也又況今古不同然古書云小兒八至為平大人八至為緊九至乃死今之小兒吾常指下審之只多大人一至為平若八九至乃是數脈必發熱生驚若以八

九至為平紫數之脉豈止此也若十至之餘乃是雀啄病已危亟今之醫者宜審而切之

小兒脉訣并歌

凡小兒脉當以大指按三部一息六七至為平和
十至為發熱五至為內脹脉緊為風癇沉緩為傷
食促息為虛驚弦急為氣不和沉細浮為風大小
不均為惡候為鬼祟浮大數為風熱伏細為物聚
單細為疳癆凡腹痛多喘嘔而脉洪為有蟲浮而
遲潮熱者胃寒也溫之則愈○嬰孩有疾未能言

筋骨肌膚尚未堅脉理未全難考据當觀形色定
由緣面帶青色肝之病赤色心病因可必白為肺
病黃属脾黑色属腎斯為得黑死還生死可生紅
深時氣有疾停赤青已援脾風了青黑傳入變慢驚
發熱鼻冷是瘡疹耳冷應知風熱證通身皆熱是
傷寒上熱下冷傷食病更將虎口紋色看或紅或
紫傷風寒青驚白痢黑中惡黃困皮端皆可觀紋
直是驚曲傷損沉隱為風因可知曲外為冷內食

傷紋得短少當安逸五臟部位怕相承更看稟受
有虧盈陰陽表裏不可亂補過瀉多須辨明五百
七十有六日大小變蒸數已畢血榮氣盛脉理全
診候方能無所失男左女右不相干須臾一指蓋
三關浮洪驚熱須遲數滑冷沉虛食積然脈浮固知
感風候浮大傷寒宜審詳浮緊驚風不可當浮數風
熱應須有浮遲之脉有潮熱乃知胃寒無所守浮
虛盜汗睡中多浮洪胃口如火災瀉痢浮大不可

醫口噤不食亦堪悲脉洪腹痛多嘔逆定知蟲動
不容說脉弦為風或為寒弦數之脉瘧未痊弦急因
知為客忤氣結下寒邪所干脉沉帶緊為腹痛緊
數為驚多瘕瘕脉牢而實大便難牢緊積聚何能
動脉浮沉濡為虛弱久亦變驚上還作虛緊伏熱
致生風虛濡慢驚真可邈脉沉而實為有積
沉數骨間煩極熱沉遲虛冷豈應無沉緩食
傷多嘔逆脉緩筋細皆為冷乳食不化兩相

宜單細痺勞伏氣攻小大不均惡候省變蒸尺寸脈
不拘既曰變蒸何必驚脈如雀啄風癇疾直上直
下亦驚名額上多青色驚疼卧不安赤時身壯熱
黃燥汗難乾

素問云心熱病者顏先赤心氣合火火氣炎上指象
明候故候于顏額額也

毛髮燥乾黃驚痺體似湯熱除煩有汗微渴意恚惶
毫毛畢直主傷寒作熱素問云寒客于人使人毛

髮畢直皮膚閉而乃為熱當是之時可汗而發之
右臉連腮赤身軀發熱時肝弦筋脈急驚哭又攢眉
身熱攢眉主頭疼肝弦驚哭主下痢素問云肝熱
病者左臉先赤肝氣合木木氣應春南面正理之
則其左臉也

左臉腮青白時時咳嗽頻痰涎嘔多逆不食少精神

素問云合金之氣應秋南面正理之則右臉也

兩臉微赤因潮熱夜間發作日間歇久則令兒氣血虛

骨肉如蒸四肢逆有一等小兒兩臉常赤氣壯實始
然非熱所作也若臉赤有熱者色必焦悴養生道云
氣虛則發厥謂手足冷也血虛則發熱謂肌肉熱也
兩臉腮青黑多啼勿奈何驚疼時進退臍臍不安和鼻
息氣粗促兒孩衄血因黃時尿不利赤色熱多噴鼻
燥兒多哭皆因肺熱為白青連口鼻吐瀉食傷脾

目鮮目眇目青驚目直心肝熱已成二臟戰爭風火盛
漸看搐搦動雙睛錢氏云目赤兼青欲發搐目直身

反強直生風又云肝風熱目連眳萬全方云目若睛
青脈左脇下必硬多吐涎沫扁鵲云目睛青脈主癰
凶也

有積眼睛黃春冬骨似湯夏秋多瀉痢胞腫嗽難當兩
目胞浮腫皆因久嗽為睛黃脾有積潮熱有瘡瘕
亦有目胞腫不嗽者因食積傷脾久必虛腫腹脹者
必痢無常

眼深微黑睛微赤必主耳聾腎受積眼稍如有細紅筋

內吊驚風是踪跡印堂多青黑腹痛夜頻啼卧睡時
驚悸無歡日慘悽攢眉因下病痺積面黃浮吐瀉形
容白唇乾渴不休傷寒身熱攢眉者主頭疼

黃色人中畔兒因食物傷形青便澱沫脾胃不安康白
唇兒瀕吐兼成失血形

紅赤亦同

唇乾唇皺揭夜熱不安

寧久渴瀉唇紅

已虛證不可用涼藥有積唇黃色者看作腫形脾虛多
夜起糞白臭酸腥唇青脾胃怯腸冷痛非常畏食多

嬌乳增寒面色黃

青肝木色唇主脾土木來剋土知脾弱不能食巢氏云
小兒臟氣不和血氣為冷所乘即口唇青白亦有臟
氣熱唇生瘡而風冷之氣入瘡雖瘡後血氣不復故
令唇青

口臭

或作燥

唇焦赤腸中糞不通氣粗多作熱睡卧不和

同紫色唇間見流涎口畔垂蛔蟲攻刺痛久則致疰

羸

涎流唇紫回蟲積痛作疼時汗出多虛痛若來脾胃冷
蟲消積瀉保安和舌白乾焦燥烏黃並為小便難且
澁心火漸蒸脾

如小便不澁必焦黃舌腫厚急欲乳不能吃者此
因邪熱客入兒臍流入心脾即舌厚唇燥不急治
殺人洗心散導赤散黑魚眼膏子貼舌上百草霜
鹽等分和塗舌上下立消舌上出血舌腫舌裂舌

上芒刺舌焦舌黑舌赤並與地黃湯

方見舌胎
舌卷門

兩耳前微赤疳攻必耳聾微黃驚入腎憂齒睡魂中

頤下微黃亦主之或曰女子無腎素問云胞胎者
腎面色形青白心煩渴又驚軀身啼腹痛臟腑作
雷鳴面色青兼赤驚來熱亦成色青腸胃冷腹痛
但啼聲赤紅傷寒面心煩熱不安眼鮮驚必作風
盛變多端有一等小兒面黃不赤却發潮熱傷寒
壯熱者必唇乾燥或氣微促也

面白黃皆見心煩渴不調因傷常夜起乳食不能消面

青兼黃色驚痺發病因睡中多呌哭潮熱損精神胃
熱身金色脾蒸面眼黃不利腸自利黃疸病難當頭
面青筋起嗔煎不肯眠身軀才發熱驚哭握雙拳唇
紅面赤睡難安頭黑青筋驚氣蟠冷氣入腸成內疳
虛風在胃變多端曲身呌哭為非崇直頸啼聲欲作
癇不久自然驚搐候陰陽邪正互相干

弄色非時變胎氣客忤驚紅青須發搐兼黑痛分明

錢氏云病重面有五色不常不澤者死孫氏云弄

色者為天色天色者死

下頤赤微微

亦主耳聾

熱聚小腸中結澀膀胱內令兒溺不通

素問云腎熱病頤先赤腎氣合水水性潤下指蒙明
候故候于頤古書有一證面青目兼黃小便澀異常
亦主滑

喉中多哽氣噎飲欲生驚二證皆癰疾看看搐搦成便
黃因內熱紅赤黑同看綠白青皆冷痺肥食臭酸有
一等淡黃沫如蟹之黃如槐花者虛熱治法在後

傷食酸餛臭兼痢白肥積停物不化結實久還稀小
兒多要吐者傷胃中有宿食宜下之妙九子下益黃
散補若此吐唾者停飲在胃黃龍九以白朮橘皮煎
湯送下孫氏云小兒飲乳吃水正乳吃食正食飲水
並成痰飲錢氏云口中吐沫後心蟲痛

面黃目白少精光多睡嘔煎被食傷嘔逆出聞酸氣息
時時腹痛實難當

先下後補

右驗實積痛錢氏云凡積痛面黃目白無精光多愛

睡畏食大便酸臭輕者磨去其積重者下去積腹痛亦去矣

時行瘡痘數日前狀似傷風面臉光乍熱乍涼頭有汗虛驚虛悸手多牽唇紅體熱時加喘鼻清耳冷只貪眠目澁氣粗頻嚏噴定知瘡疹有相傳

瘡疹多驚悸時行候一同增寒偏要水發熱又嫌風目澁雙睛白胞浮兩臉紅嗽涎聲啞噴呵欠睡朦朧瘡痘相傳染時行若感風唇乾唇緣白目澁目微紅疹

出眉先皺瘡來鼻不通皮毛寒聳立麤豆隱其中時
氣行瘡豆形青面臉鮮紅煎頭有汗恍惚手多牽嚏
噴兼微嗽噓呵欠愛眠睡中驚起哭瘡疹欲相傳孩
兒驚搐定體熱狀如湯斑疹藏肌肉身涼出豆瘡身
熱心煩躁驚來耳似冰指稍俱帶冷豆搐甚分明

湯氏雜病形症歌

鬼病皮膚裏相傳臟腑間腫虛如水病癰癰似風癰發
熱渾身澁痛連心腹攢小兒若有此服藥醫急看

時氣皆因節令虧頭疼壯熱汗微微良工仔細看時候

當作傷寒病治之

宜服羌活散惺惺散

熱氣流傳脾胃居致令黃色在皮膚須知其病真如可

何用燒錢問女師

此證宜服五苓散煎茵陳湯調

熱氣還逢腑氣衝便成結毒在腸中身體若煩多燥渴

更兼尿糞不能通

此証宜利下輕則利之用四順飲重則下之用金星丸

時氣還須早早醫變成敗氣急難差乍寒乍熱無時度或

去或來體漸羸

小兒骨蒸者皆因時氣不治療漸成敗氣羸寒熱往來是疰勞宜服地骨

皮散次服星
露膏紫甲散

陰陽邪氣兩相并臟腑陰陽各競爭發作有時名是瘧

早須醫治莫留停

此疾宜服正氣散
并瘧藥草菓飲

雖然吐下熱猶餘蓋為元因臟腑虛熱盛虛時皮肉澁

治令燥渴不能除

此候宜服五苓散以上俱是時氣
傳變有此等候初無治法學者當

審其根源量其輕重
虛實用藥何患不痊

時氣雖然瘧猶多餘熱停氣傾瀕不食頰冷面皮青熱

盛血分血散行鼻出血分人可驚皆因汗而不得汗

上壅喘兮聞有聲

大凡時氣與傷寒病相似初病在表速宜汗庸醫恐誤失表漸入腠

裏其熱昏于經絡血得熱即散從鼻中出故其名紅汗也宜服小柴湯大便秘用大柴湯

病未入而先下之乘虛入腹怎生醫痞滿喉中生喘急
結胃之候切須知傷寒熱毒胃中存久作班瘡發
滿身若見舌唇渾似黑只因性命在逡巡

黃病皆由胃熱為痢加腹滿脈沉微見此候時須用意若
言魂去定難醫百日孩兒或作黃非干溫疫及時殞
只為胎中遭熱盛勿令人灸作成瘡

此候乳母宜服生料四物湯用

生地黃赤芍藥乃是也兒亦服云

瘧疾因何渴皆因臟腑虛熱餘多飲水結塊腹中居

小兒胎裏受風寒生下令兒不得安腹痛軀身頻哭泣

此候良工仔細看

此名軀啼宜服鈎藤木香乳香等藥

風冷傷筋脉四肢全不仁痛同風熱搏緩是熱傷筋寒客于喉裏啼聲似啞人溫和用湯藥不爾損精神

小兒虛腫一似吹蓋是風邪夾氣為若見皮膚如熟李

此名痺水聽因依

此候宜服塌風散并五苓散加木香青皮用燈心煎

脾為土壤不尅水便為腫滿入于脾腫痛行時還熱痛
若居血氣即成之若看此候須審細莫教差誤使傾
危太陽入耳聽聰聰氣滯多因耳必聾鳴是風并氣相
擊痛應腦戶有邪風腎熱鬱蒸停耳患漸深疼痛出
稠膿不痛即非氣與熱緣因風水入其中熱氣薰肝
眼必昏其有輕重必須分輕疾熱多多熱淚重生白
翳色如銀赤目眚頭成努肉朦朧睛上似浮雲洗肝
飲與頻頻服只此良醫是異人

小兒飲水久停肝翳障全無辨物難夜裏不明為雀目
青盲晝夜一般般小兒胃熱斑瘡爛眼瘡復疼發渴無
蓋為熱氣傷眼臉世人俗諺號胎風毒入喉中熱作
癰名為喉痺食難通馬脾額間生腫痛重必心煩命
必終

凡有此證急宜
吐出惡涎為佳

胃熱皆因血氣強四肢溫壯小便黃表裏熱時煩躁甚
渴多身體熱如湯客忤多因人物衝更遭鬼氣亦相
逢吐下青黃并白沫水穀開張痛又攻面色青黃時

變色脉弦急數不干風亦似驚癇無上是早湏醫治
莫從容小兒氣弱命中衰魂魄多因被鬼持其候痿
黃頻哭泣衡人冷氣早湏醫乘年衰兮逢月空失時
和兮三虛中遇賊風兮還卒死一如鬼氣候湏同臟
腑未絕兮湏存活急湏救療兮莫忽忽疝氣因何得
邪風在腎經經傳并血聚如此漸成形冷氣結在臟因
弦小腹疼本經無補法疏利藥通靈霍亂因風急忽然
吐瀉并有時連風痛或即遶臍鳴乳母因傷冷孩兒

有宿癥夾風身發熱臟實更頭疼

小兒吐痢早須醫早是腸虛胃逆為更有中他湯藥毒

必知煩躁在心脾風冷傷于乳變壞汁須凝孩童生

嘔逆氣喘腹膨解脫當風處洗浴向簷楹哭中還

吮奶氣逆在胸停嘔吐從茲發良醫諳本經當全乳母腹
強順釀乳藥

血為榮兮氣為衛二氣相須無阻滯忽然血被氣來侵

所以妄行不安位血隨氣上奔心來吐出鮮紅爭忍

視便須服藥急醫看解熱涼中依次第脩急即服藕
汁及蘿蔔汁

治法當順其
氣次行血

產母懷胎忌數般若令冷傷便憎寒生下嬰孩不吃乳
更加腹痛肚皮堅乳哺寒溫不著量致令壅滯在胸
堂更兼新乳相投觸不得安和亂胃腸因成吐衄須
醫治診脉輕浮壽必長衣厚傷溫損小兒熱蒸津液
透膚皮致令身體連頭上汗出流珠汚濕衣小兒血
氣未調和腠裏開疎易染疴將養傷溫成盜汗早須
醫治莫蹉跎

此候有二般有虛汗有心血溢汗治法不同切宜審詳虛汗乃脾虛不能剋制津液

當補脾心血溢汗兩腋
亦當飲心氣涼血為佳

飲乳并傷水為痰結在胸令兒乳不下吐沫似癰同
實則身烘熱謔言入夢中還須早醫療取久變驚
風

三焦若不調胸寒氣極急煩滿喘氣麤暖出酸臭氣乳哺
不能消結聚成癥癖有形名曰癥乳動為癥積弦強
癖之元分明記胸臆胸中熱兼實榮衛不通徹臟腑
不調和經中名痞結氣滿腹肚脹時時及加熱不用

問神明此是分明訣

察形證神色

凡看小兒病疾先觀形證神色而切脉次之面青
睛青肝之病面赤心之病面白肺之病面黃脾之
病面黑腎之病先欲別其五臟各有所主次看稟
受盈虧胎氣實虛陰陽二證補過瀉多當救其失
兼五臟六腑表裏有各相應配若能明其標本則
神聖工巧自然有之

察形證歌

搖頭揉目肝熱生風眇淚咸明三焦積熱鼻生清
涕肺受其寒頰赤面黃風傷肺熱霍亂吐逆胃積
氣傷瀉痢不常氣攻腸滑面青呵欠驚風傳肝盜
汗頻頻臟腑熱傷寒戰驚搐風盛發狂胃熱生斑氣
傷冷厥長吁齒齧風盛氣生上竅搖頭涎流胃熱肺
壅氣傷咳嗽咯血涎盛發齁積傷風熱小便淋瀝
熱聚膀胱疝氣因啼胎中積結如脾痞瘕因物所

傷喉閉丹瘡肺之受熱愛吃泥土脾臟生疳嘔逆
痰涎蛔蟲上出鶴膝解顱因風腑熱熟審而用細詳
使藥病證疑難

逆證似順

順逆有別陰陽不均證候相加色脉致亂惟驚風
發作按脉察證以較之陽候證脉俱得其陽陽者
順也陰候證脉俱得其陰陰者逆也陽候有陰脉
者其證欲傳陰候得陽脈者其證反是也謂有急

驚風乃是陽癇得脉浮數洪弦陽中之陽又有得脉沉緩陽中有陰慢驚風乃是陰癇得脉沉細遲弱陰中之陰又有得陰太陰中有陽所言逆證似順乃謂陰中有陽助陽不醒回陽不生其候偏虧雖則陰中有陽其陽非真脉使疑二不可攻理詳而知之察其可否而後已

陰證反陽

小兒傷寒惟察表裏而理之不以陰陽證候究竟

者蓋無關前關後之脉所謂純陽之孩合而言之
此說驚之陰候慢驚是也凡兒吐瀉疾作慢驚其
候無反證良由急驚傳來已成陰癇藥用寒涼證
入慢脾藥用燥熱其候反陽者反從陽也其脉愈
盛其證愈逆故云反也陰陽俱壞實謂難治醫工
不知所似但見其搐搦肆意退熱截風良久怯不
引搐但只合眼即醒醒如睡證候有如此何藥理
之

陰盛強陽

慢驚風候謂之陰盛及其欲絕之時虛痰上攻咽
喉引其呼吸粗大其脉浮數其證強陽得之醫工
將謂陽回以得其所宜與下痰藥用大迅痰涎隨
藥而下兇命隨藥化衆言醫殺之非也謂不識胃
絕而用之雖不下藥亦死矣

虛極生熱

痢疾有作斯證初發即證痢氣次第傳至痢極是

謂虛極之後陰陽二氣不均上下氣不升降榮衛
兩虛臟腑滑泄豈可攻療善醫痺者隨順藥餌以
助之淡薄飲食以扶之榮衛始得均勻氣脈方得
升降既而陰陽二氣已得調和臟腑已自充實肌
膚已自肥壯醫已知工痺傳虛候名作痺極遂與
補氣藥服之稍多及生大熱所謂虛極勿補熱盛
煩渴疾作痺勞名曰丁奚皆由藥助虛極生熱而
致之也

冷極必寒

癥積已作證候所傳自是孩童飲食不化氣滯中
脘再食停氣復傷前積積之為病皆致其冷冷之
既久脾胃虛怯既在陰陽相勝寒熱間發痞癖有
加脈氣無定醫工不理陰陽令其勻平但作疾瘧
治或投礞利下大速疾不去根為患反重難施利
或投柳
劑良由動利臟腑虛必復發作煩燥腹肚脹緊氣
喘短促難以調治此等證候究心無忽保全是幸

熱多作燥

熱分內外身藉陰陽一氣受邪三焦致熱三焦者
本質無狀隱伏得名所通五臟六腑相傳血脉皮
毛溫平由實燥熱由虛靜則為一名動則分三所
上焦喉管至于中脘下焦至于丹田以大桡指展
中指作一掘自咽喉坎處分作三停則知上中下
三焦所寓也溫極則熱熱盛則焦寄于其中矣大
人患猶尚不可況小兒三焦隱伏熱多作熱寒涼

之藥所投不堪畢竟當從何劑調理若不早療疾
作無辜

理虛致虛

虛則作疾實亦是病按實理虛遣病去疾內知其
冷熱外審其證候三實兩虛神不安居三虛兩實
人有得失虛之為病其候則速實之為病其候則
緩實未致害虛則作禍迅矣肝心脾肺腎子母相
生肺肝脾腎心五臟相尅且如脾胃經虛嘔噦不食

又心氣不足驚悸有所療子母俱虛小便閉澀利
之可乎所以知其內者母虛靠子實子虛藉母榮
又肺家有熱宜瀉之否大腸滑利宜溫之可醫工
但究母虛理其子實若攻其子則母亦虛所謂母
能令子實子能令母虛脾病瀉心理實致虛矣
利表傷裏

傷寒豆疹皆論表裏二義不同所受及是傷寒所
傳從表入裏豆疹所發自裏出表作熱形證與傷

寒頗似醫家不究輕重所受所干與服外麻葛根湯或過劑餌飲其表裏已解其汗不止出汗過多裏虛作渴且熱乘熟悉化疹豆自然迴出緣逐其熱利其表遍出雖多疹亦不成豆亦不是比比小赤由其熱力且有限裏外不相續榮衛不加助于中道而廢漸加黑陷非食毒感風之咎自是助發大過失其自然之理至死莫知其由是謂表裏傷寒故也

退熱作渴

小兒發熱一證與大人同熱在三焦方渴肺驚不利虛煩方渴上成下虛方渴水火不相濟方渴伏暑蘊熱方渴津液燥竭方渴渴證本無但有其熱熱在于表攻動其裏裏自無熱受之以虛表熱傳裏反致其渴表裏俱虛引飲入脾頭面手足受濕虛浮作腫醫工下之徒增其病宜與扶表救裏庶幾有命

痰驚發風

有痰者必有熱隨之有驚者必有風繼之利其驚風必有散其熱即痰不生此醫者流所得其宜調理證候截風定搐以除其惡也常見豪貴家才見孩童有熱不問元因便投驚藥日輒數粒月既積多雖則驚悸不作忪恐無妨其兒所服寒涼藥多脾胃虛弱不吐即瀉遂成慢風更與驚藥愈加其疾調理醫工當究之也

風痰隱久

風者肝受之肝稍不和則風所由縱痰者脾受之脾若不壯則痰所由盛痰之與風驚之與熱四證在馳在流行則經絡傳變它疾風痰由襲久而不化隱在肝脾所由飲食冷熱相干不散雖則療理愈而復作以至長成且風痰常在牙頰之間吐如無畫生發有因或作鞠踰或喘息或硬牙關或腫頤頰臨于肺則咳嗽干乎心則恍惚善術醫士未能

速下其痰恐風猖狂者逐其風又疑痰作梗須是
風痰並化妙藥奇方陰漸減瘥可也食不禁戒服
藥無攻若療風痰可不致緩久則發疾亦深究之
驚熱無時

因驚而得熱其熱常發不擊手心而屬乎血更加
氣血榮衛母得備還驚熱時常發作或生疥癬或
發瘡癩熱來神困心虛熱去唇焦口苦舌乾求飲
恍惚忘飢兒孩受此艱辛藥餌如何救療人參羌

活蝎尾當歸之類總不相聞更尋妙餌可也

恐悸喘息

驚悸心属喘息得同而言否愚曰非心主之若心
所受其疾不作喘發是知肝藏魂肺藏魄魄不安
恐悸傷乎肝肺受其驚而受其喘須求水飲肝受
其驚發喘細細若張口大喘者肝肺俱不利鎮心
安神調氣定喘未必盡善當于損益魂魄丸散瀉
心補肝竟切効

食噎咳逆

兒孩睡息魂魄恬遊擊響高聲傷乎其神睡中不
穩乃心不寧乳幼飢渴飲食宜細掇物觸志傷乎
其氣令肺作噎肝脾發噫其氣逆升降其志不分
伸舒陰陽差忒胸襟鬱悶良久取氣發聲含飯面
黑啼哭聲焦輕則咳逆致燥盛則咽塞不通所受
之後常作欬逆者良由食噎觸擊悶挫閑竅宣通
臟腑即宜升降榮衛乃利逆若不早治欬逆肝腸

終其身致疾而難療矣

令子無辜

夫人所藉者陰陽而生所宜者氣血而長血氣不順則五臟以違其和陰陽不均則百脉亂其體流之於表裏相叅注之於經絡致急凡周晬乳兒等閑捉拳又挖齧身體檢束頭目搖動此乃陰陽有虧榮衛失正即名胡孫禁十二種無辜疾之一也母情不識見之喜笑復作體態教令致其然也父

而不已則其病漸至風痰之所攻驚熱之所作也
當遍舒其氣調其脉均其陰陽適其洒淅

受氣不促三才降氣數成方謂為人萬象論功道合始
知得志胞胎既脩心定神全血脉未克骨萎髓薄筋
力藉乎骨體智謀出乎心神為人恍惚者斯可知多
忘者應由是偃倭者乃然侏儒者必告此不及受之
重者身負五軟大過受之深者身負五硬由其脾肺心
肝腎所屬者氣血脉筋骨所受者體舌臂項膝其或

有疾于證候不及議者往往無辜無辜形體必定受氣不足謂知五硬五軟只許聞名稍有永醫難著後進執謂堪與療理者野老付之一笑

飯多傷氣

幼幼未降形處胞胎藉母氣血滋陰由如養素已誕之後繼時叻之以乳乳者化其氣血敷養肌膚百脉流和三焦順順身體漸舒骨力漸壯三周所庇一生為幸其或母因產得疾血竭氣耗乳不成汁當召妳

子看顧貧乏之家食不繼口奚能講此其乳少其食多不益兒體其有不產之婦抱幼繼宗終夜號啼惟飼飯食初傷其氣次傷其神重傷其命姜羸聲軋躁皮皺項軟足垂唇焦骨劣再過半載時光則兒氣散神敗凡人生子吮乳為正獨以穀食扶持十中未保一二抑服圓散強為勉之急吮乳蔭始得死中半活矣

臍腫受熱

初生未及蔭乳洗能便用斷臍帶留一握綿裹三
重受氣根全者其臍自深成胎數闕者臍自突臍
者受質之根也為人之本也形體之基也元命之
壽也迭月之前一臍之後其兒臍紅高腫不作水
濕亦無風候但將胸堂仰起呃呃作聲闔家無見
責之老嫗有傷臍帶致之非也召愚一觀察知心
氣受之胎熱與利丁火少項不展胸堂呃聲遂止
越宿視之臍根復本醫工與傳及洗搃施謬妄故

書于褚果其宜哉謾峯願以誦之云耳治中受病
諸證

鬼胎

婦人產育有患病胎者痛鄙婦人納鬼之氣而受
實非也鬼胎者乃父精不足母氣衰羸滋育涵泳
之不及護愛安存之失調方及七八箇月已降生
又有過及十月而生初生胎氣血虛羸降誕艱難
所言鬼者即胎氣怯弱榮衛不充致子萎稍語猶

如菓子結實之時有所陰藉不到灌溉失注為物福
小其形猥褻無有可援如此之謂胎氣怯萎常與九
散扶挾乳哺勻調氣血充陰腸胃固壯筋骨即保其
盡善蓋由受氣不足稟賦不全忽爾橫殤非可惜邪
癘病

小兒有患病癘者非五臟傳變亦非六腑所主也
緣兒生後方及周晬母復有孕血氣所蔭分之兩
端是故胚胎漸傷乳汁成毒虛邪相攻兒吻致疾

飲率其氣鬱傷其神魄令兒疳虛疰羸枯悴煩躁
朝昏嘔噦日夜啼哭不可得療但速斷其乳溫平胃

氣和順血脉自然而愈其有萎怯致痰乃成無辜

證

巢氏病源云小兒被鬼病者婦人懷妊有鬼神導其腹中蓋嫉妬所致或服邪藥令小兒鬼病

也姓娠婦人不必悉能致鬼人時有此耳鬼之為疾頻下痢寒熱往來毛髮擊擊情思不悅是其證也千金又論鬼曰小兒鬼也凡婦人先有小兒未能行母繼有胎妊鬼未節乳漸覺羸瘦骨立毛髮稀黃不長時作壯熱大便不勻乃鬼之症也

胎氣

初生牙兒三朝之後滿月之前所受諸証作疾輕重不同者蓋由胎氣稟賦有強弱其母飲食恣令飢飽起止無忌坐卧不擇令兒得疾不寒即熱不虛即怯熱乃作壅寒乃作泄虛即作驚怯即作結寒則溫之熱則涼之虛則壯榮怯則益衛驚用安神結用利詳審用之不必過劑

胎病

牙兒胎病謂月數將滿母失護愛或勞動氣血相

干或坐卧飢飽相役或冷熱飯食相制或恐怖血
脉相亂胎氣有傷兒形無補或因動土興工或由
榮葺房卧或移安居或更薦席雖不犯凶神惡煞
終干礙子體兒身有因如此得疾者乃成終身疾
者斷不可醫初生幼幼又被干邪即時和順調理
胎病作熱

兒在胎中母多驚悸或因食熱毒之物生育之後
兒多虛痰氣急短滿眼目眵淚神困呵欠不發伸

舒呃呃作聲狀小便不利或通利即有血水盛則
手常拳緊脚常搐縮眼常斜視身常掣跳皆因胎
中受熱宜連與大連翹飲子解散諸熱次與消風
散數服無恙

胎氣蘊熱

兒在胎中母多惱怒鬱悶之情不散又因胎氣燥
濕兒生艱難母生驚悸是致乳汁不可兒吮成毒
故作熱令兒食即嘔吐眠不定席神不安穩聞響

即掣若不解蘊毒熱相干久作無辜成疾害生先
宜順氣次服四順若不安愈葱根必効

胎病風熱

兒在胎中母常喜食動風之物熱毒流傳致兒之疾
隱在經絡則手足拳攣注入血脉則肌體枯槁其
兒眼常喜竄血不蔭心神不守舍怯人怕物視作
定目若不早療恍恍惚惚形體雖長情性乖拙為
人多荒朝記夕忘雖久受病不如無生蓋父母但

知惜其嬌姿安養無用之兒如此者凡胎氣服藥
須用詳細若以常方難治

胎病驚熱

兒在胎中母因驚悸驚氣入胎兒當受之生育之
後其兒精神不爽顏色虛白初則溫溫有熱其後
頰赤饒驚物動則恐響即悸若不綑抱安床取次
難為調適既有胎驚將傳胎風之候產母謹謹忌
食一切熱毒之物若作尋常畢竟難治是蓋血脉

柔弱臟腑虛怯不堪重劑何可攻擊是使智者怯
懼若輕受熱已有散即於項上生癰其大如拳名
曰驚癰須當破之而後合之勿傳毒藥恐傷肌體
不惟傷壞深恐為禍

胎病風痰

兒在胎中母喜食熱毒之物熱即生風脾肺不利
遂有風痰雖不能損肌傷體其痰與風相襲痰多
風不散熱盛痰復生風痰能作熱更加暖被紅爐

母食炙煇淹藏動風之物即時害生藥非不驗乳
汁之咎也如兒或患風痰不必下截風化痰藥但
清心肺涼膈利順三焦則自然安愈亦不可太涼
恐寒傷臟腑宜以消風散吞下白丸子至涼冷小
作丸

胎病結熱

兒在胎中母失調理恣縱飲食不加將護蘊熱頗
久及至生育熱氣隱蔽傳入於裏遂作悶結由熱

極得之大便不通熱衝心腹脹臍突撮口努力停
鬱急以三黃丸或四順七寶以通為度不必過劑
切不可下積丸子藥不惟無益恐反為害

胎病寒邪

兒在胎中母因感受寒邪熱氣煩蒸傳入胎臟兒
當受之及至生育令兒閑竅不通精神昏濁作熱
加蒸啼聲不響號叫駭人未知之者將謂驚風妄
動臟腑或妄鎮心良由所受寒邪初只在表久則

傳裏邪氣亂真血脉皮毛皆不得其便腠理所拘
邪不得解變蒸有違氣血致傷煩燥益增無能自
暢但與小柴胡湯服稍輕次以人參羌活散然胎
中所受未分表裏既生陰底當議和解為良

胎病榮熱

兒在胎中母喜啖薑瓜古人有云修竈缺唇食薑
餘指蓋薑性至熱又是燎藏攻及血脉傳入於經則
令兒遍體生蛆瘡延毒熱瘡丹瘡之類經年發作

或於頭額生核重則大發癰癤潰則爛壞皮膚十
死一生何堪忍見初生幼幼毒氣加盛肌肉柔弱
參朮托裏互相扶持常與清心平調血脉母慎其
口父抱令暖醫工順理與扶其危

胎病衛熱

兒在胎中母傷和氣飢飽勞役神疲力倦否則憂
愁思慮役乎其中動乎其氣攻以陰邪干亂心魂流
入胎臟兒乃受之既生之後兒常昏困腹急氣粗

重則喘急睡卧不穩狂啼煩哭肌肉不滋遍生瘡
瘕身熱早晚精神少具宜平調臟腑臟腑既正熱自
散止

胎病臟寒

兒在胎中不理其身母喜食諸生冷物過度冷盛
既寒腸鳴泄利時時有作生育之後兒腹青脉膨
脹虛緊乃是虛氣入腹呃呃作聲日夜不禁雖則
漸長終是臟腑陰陽二氣受不勻調若不溫平分

氣長成痞結陽結易治冷結難醫誠宜母服藥
庶乳溫令子調和

胎病潮熱

兒在胎中母曾發作子瘧或是因患瘴氣母或飲
酒無厭或是胃風傷暑經絡榮衛為熱所傷母雖
分娩以脫其難兒襲其氣陰陽不分初生嫩弱血
氣不和作熱潮來先寒悶緊身體作顛庸工未識
其理即以艾炷灸之未免有傷經絡但與調中均

其陰陽便可漸安

急驚風候醫云陽癇也手足搐搦涎潮大熱醫家下之
往往利以輕粉或水銀巴豆此等毒藥雖已甦省精
神猶尚昏沉未快乳食者或有餘熱其候欲得安痊
平和只可用平穩藥調胃氣不可便與燥熱藥若與
服之其候復作矣

小兒驚風之後胃虛不食助胃生氣以截風藥移
狂生胃散或觀音散中加用全蝎天麻僵蚕白附
防風羌活之類生薑棗子同煎自然胃壯瀉止諸
風不作雖則驚熱及搐搦皆去其精神未爽不可

便謂無事若用補藥助虛乾薑豆蔻硫黃附子之類則熱復來其候又發凡治急驚之候正謂醫療豈可遽云調理用藥乃在一時之久若少寬緩症候轉如深重醫者既知當下即可量其輕重如病五六分只下三四分許隨通且利熱去痰消則病徐徐減差不揣度一槩并湯下之太過傷害臟腑痰轉陰候乃作驚風候豈可臨時生胃回陽

慢驚風候醫云陰癇也良由急驚用寒涼之藥太過轉加深重傳作慢驚或因吐痢不止而成慢驚或因澡浴感風不解而作慢驚或因風食二癇不治而變成慢驚或因咳嗽下痰轉虛而成慢驚因由甚衆槩而

舉之病家怕驚不怕瀉良醫怕瀉不怕驚其瀉不止
驚風愈盛若與治驚更用寒涼之藥且瀉轉多病加
進重矣

小兒脾胃虛怯方作吐瀉其証有五有熱吐冷吐
虛吐痰吐食所言熱食吐者謂母飲酒吃肥炙燂滯
藏或胃風傷暑致熱兒吮乳入胃遂成熱吐冷吐
者謂兒胃冷加以宿冷之物與食即吐虛吐者其
兒肌熱神困疳積未消胃堂久虛即吐痰吐者
其兒胃氣本虛復感寒邪生痰作熱留滯胸膈
故吐食吐者其兒胃弱飲食不節強食傷脾作熱
神困吐後即逆病家但知其吐不明所以且吐兼
瀉作其名曰霍亂其吐後又推輕重有五初則乳
自流出謂之嘔嘔之不已即謂之吐吐之不已即

作嘔嘔之不已即作噦自嘔逆噦皆有出聲動氣
嘔者口開而作逆者心胸上下氣逆鬱築噦者無
物可出即膈虛胃寒引噦噦作聲此等候惡須更
證變即慢脾風熱者吐先去風痰冷吐虛吐與生
胃氣痰吐即與下之次與正氣食吐宜與瀉氣豈
可一緊理之吐瀉不止脾虛風生眼開慢驚眼合
慢脾治之不當更下驚藥旋腫而死豈可得而塌
療兒分長幼病察虛實有吐瀉三五日發風者有
一日半日而發者大抵女孩以吐為急男以瀉為
速若虛暴吐才作便得之惟有痺瀉不成風候久
則虛無辜証終于虛乏驚藥及寒涼之藥切不可
可用亦不可用大熱藥其候乃屬陰證

小兒熱證古今十種為總例有驚熱疳熱風熱潮熱傷

寒熱瘧熱積熱丹熱瘡熱熱餘毒熱

十種熱證病各不同已有觸類而作潮熱者即痞
癰熱也類近積熱證先腹壯熱脚冷者是傷寒熱
與瘡疹熱亦相類且傷寒有三種皆從表發入裏
瘡疹隨五臟所受從裏入表故不同根風熱與驚
熱亦相近症熱與餘毒熱類瘕有五證瘕有五候
皆由脾家陰陽不順若驚熱盛即風熱作丹毒熱
有類種皆五臟熱毒所作自上發下曰毒自下發
上曰丹毒各隨輕重又有一種名曰龍帶橫腰過
肚上或至胸前相交者重有如火燭其候亦同丹
治病候餘毒熱諸證皆有之適輕重類諸證而調
解不可越前病用藥如傷寒後有餘毒熱則於傷
寒調理下而解餘皆倣之大致驚熱涼之風熱化
之痺熱補之潮熱散之傷寒熱解之瘕熱分之積
熱利之丹熱消之瘡疹熱甚表之諸證餘熱皆和
凡證不可便下蓋小兒得病皆由身體柔弱中
來雖有外感宜先和脾調胃令其充實後以藥

下之方保無虞若積症已作可先下而後與調胃藥服之然下藥一應即止不可太過太過則傷脾胃反致病重也惟痞證定宜先去寒熱寒熱已去方可用下總以通為度下之太過反生重熱雖有重熱即不宜用涼藥宜以調理胃氣藥與之尤宜深究

小兒傷寒正受夾驚夾食

正受傷寒所由冷邪感于胃傷于脾理輕則傷風重則壯熱頭疼鼻塞流涕斯乃正傷寒候又有傷風傷暑傷冷傷濕皆能作熱因乏但不咳嗽又有因驚之時而傷寒故云夾驚又有因食之時而感寒氣者故曰夾食大抵傷寒或有它證以積之類切不可妄下者下之太早表裏俱虛難以調理謂之壞證大人壞證由尚可藥小兒壞證救療無門凡傷寒有驚候亦不可下藥雖夾驚又有不可用驚

藥幼幼傷寒只可解表雖曰用表不可令兒汗出如王氏曰杜薄苛散和劑方四人參羌活散之類若熱在裏譫語煩躁于證當下只用散末藥七寶洗心散四順飲犀角飲之類不可用九子或以取積藥下之其熱不去反成無辜夾食者于理用下宜以紫霜量虛實兒用須問先傷寒後夾食後傷寒然傷寒夾食乃在于食時之間惟母覺知其先後多是不覺若知之以後受者先調理之既不明其先後即解表可以扶裏此法為尤善也且下與表二不可並行且如三日前在表三日後在裏斯乃犬槩約而言之恐後人傳之不當反為其後凡傷寒在表即解在裏則下不可以日限為拘其或有在表裏之間亦宜和解如又不愈小柴胡湯治之又不可愈候傳裏下為良大者識語小即煩啼切不可意急取愈宜在用心明究表裏

小兒積證

積證最為要緊病家將作尋常醫者不急治之反至傳變方覺困重東漢王氏不言疳與瀉及痢即還證而已所以治未病之病凡小兒自幼及長不患驚風癰瘰瘰癧瘰癧有之矣未聞無患積證者五臟之所積名曰積六腑之所聚名曰聚且小兒只理五臟受病故不有大聚證者六腑屬陽雖有疾不治而自愈且骨屬脾氣生于漸乃脾胃主有疾當治之臟屬陰治之尤難調治四季有積欲調理之皆可用藥但當究其虛實然後利之既有積氣不能全實量其輕重故古人有拔積療積消積化積無積之說

小兒有患驚風痰熱四證如何用藥

小兒有熱熱盛生痰生驚驚盛發搐又盛牙關緊急及盛及眼上窺痰涎擁牙關緊風熱極閉經絡

即作搐搦涎擁胃口悶亂不省才入中脘手足拳
攣閤竅不通百脉凝滯有退熱而愈者有治驚
而愈者有祛風而愈者有化痰通關而愈者皆是
依證用藥不可不究其所以凡病在熱不可妄治
痰病在驚不可妄治風病在痰不可便治驚病在
風不可治搐凡治小兒病在驚由痰熱痰只可退
熱化痰其驚自止病在風風由驚作只可利驚化
痰其風自散病在痰涎急須退熱化痰若有搐搦
用截風散驚若意急雖治驚痰不化熱何以退驚如
何自止化痰其痰熱若不退風亦不散痰如何去是
知不治之治
所以治之

小兒泄瀉除痢瀉為虛熱餘瀉皆臟腑虛寒怯弱得之

小兒臟寒腑冷大腸不禁總謂之瀉分別輕重究
竟緩速者有瘡泄有滑有利有洞五者不同豈可

一槩而理。澹者糟粕不聚。由其尚濃。似瀉非瀉。泄者無時而作。或出不知利者。直射。澀溜氣從中脫。滑者穀食直過。腸胃不化。洞者頃然下之。如桶散潰。餘更不留。即知其兜臍寒。臍冷瀉之作。疾其來緩。速輕重可知。凡兇瀉。糞出青色者。蓋脾受肝經所制。肝屬乙木。能克土。所勝之氣。故見本質由其臟之虛寒。非謂驚也。又瀉初黃。良久變青色。乃臟之微文。瀉藥物直過。尤寒滑。凡虛滑三五次。即因乏。若不急與溫其臟。調其胃。平順三焦。和正榮衛。不爾。即慢驚證。候傳變。傳如此之急。欲以止瀉藥次第理之。往往不及。惟務溫其臟腑。臟腑既溫。寒何能留于腸胃之間。或以熱藥頓止。則熱及為他疾。須先投瀉腸藥。然後生胃正氣。與服切不可意急過劑。投之熱藥也。稍或臍臍至虛。孩童困乏。四肢軟冷者。是胃逆證。當用黑附子白朮乾薑量輕重而用。凡投熱藥瀉止。則痢作無疑。

小兒痢疾醫云五疳八痢究其理種數多端輕重不一

痢者利也痢之為痢無積不成反至積化成痢且脾胃亦虛即不可便下善治病者生其胃溫其脾厚其腸和其氣無不愈也若成痢疾故不可下下之反虛作渴浮腫痞滿脹急不食亦未可便補補則傷熱能令脫肛切與禁却一切毒食之物頻與生胃謂赤或氣或白即是冷熱不調或受暑知溫即與分陰陽氣利水穀道若裏急即與厚腸胃肚痛即與和順氣溫臟或化白者乃積冷毒加之即挨其毒却與溫其脾胃其痢自止凡痢疾能飲食可治不能飲食疾名禁口主不食而死又有毒氣侵胃口亦不飲食或急痢疾因食毒物下攻腸頭解血頰汗肛脫瀉下惡物可畏腹肚疔痛裏急後重名曰滑腸此三種痢疾最為惡疾乃是十二種中皆能傳受而作此疾凡言小兒美飲食者飲謂飲

乳食謂食飯若病中能飲水漿喜食菓子魚肉之類者亦助其虛不能令臟腑充實須是白粽子爛煮飲可矣若以葱粿粘臟不堪脾胃之物尤其增困幼者叻乳尅化漸安五臟平和六腑調貼然後陰陽自均氣脉自壯九散湯劑不必抑之或有餘毒宜以順調緩助不可攻之又有時氣作痢薰習相染而或由天氣晴雨不常陰濕冷熱相干腸胃糟粕不聚遂成其疾腸肚疔痛裏急後重他藥莫治者宜服木香黃連地榆川當歸白芍藥赤肉豆蔻為末蒸烏梅肉丸棗子湯下三五十九如麻子大加減神良

小兒痢疾證數端其後不同發作不常治療不一方論不等輕重斟酌隨宜設方必有可理者

疳者甘也。疳因脾家有積虛而致其積不可復食。粘膩甘甜生冷炙煇之物故名曰疳。初作名疳氣。皆飲食不節生冷相投積傷久滯不化而得之。久則疳氣傳于五臟。傳足名疳。極候腹大。候雖食不生肌肉作渴煩燥名虛候。時發潮熱盜汗常有。名疳勞候。如手足無肉者多名丁奚候。自丁奚翻食吐蟲虛熱來去名曰哺露。十歲以下曰疳。以上曰疳勞。治勞之理悉不用疳藥。蓋疾作傳足非常。治疳之法理其氣虛助其血弱調令脈壯消其蟲子散去疳熱和順三焦無由用急力攻治不可勉。強投藥只可對候而設不得過劑。若冷藥易動臟腑躁藥易損三焦審察端的九散隨其輕重無所失矣。

小兒諸證悉皆著載方藥調理發度惟有咳嗽一證究

莫能盡月內牙兒難醫百日嬰孩亦難調理

所言牙兒及嬰孩咳嗽難治者蓋為初生血氣微弱五臟未充身體未周應變應蒸未周之兒所感寒邪攻及腠理表裏相干邪正相勝陰陽未和不可強主攻治妄主吐妄下妄汗補皆令兒疾轉盛不惟無益甚有害傷幼幼咳嗽乳母之過九散狼虎醫人之罪豈特牙兒及孩童難為調理小兒有咳嗽未許一二服藥便見安樂雖傷寒傷風證候已歸半復且咳嗽尚作大抵究竟小兒咳嗽先看有無熱與痰有熱在表無熱傳過是未傳痰稠熱盛痰壅即吐宜服補肺散人參伏苓麻黃白朮杏仁甘草阿膠訶子地骨皮桑白皮桔梗有痰加半夏風熱加防風天麻服之自然痰化熱散咳嗽漸愈未可直用麤滋藥白礬南星石膏雄黃砒粉之類宜先滋潤脾肺次用王氏金華散少少時時與服

或以白丸子加雄朱腦子隨大小作丸凡患嗽
須究表裏未可以動手便攻若用金石藥直入胃
皖乃成提脾風候手足勿曲又何所益巴莖輕粉
砒霜藥下之腸胃不禁須臾成風亦何所益只用
溫平與表順助其氣滋潤肺經和順三焦其痰漸
化其熱自退不必攻醫所謂理嗽宜且補氣化痰
即生胃氣胃開氣壯即嗽漸減胃正即痰不生肺
滋即嗽不有然小兒氣弱其嗽作熱與大人一同
而用藥調理實不同又有時氣咳嗽謂天時冷熱
不同幼幼虛怯受患者表其嗽曰夜不輟或吐或
喘痰熱壅盛至重者利之即愈謂用大黃朴消枳
實陳皮半夏人參厚朴柴胡心神煩悶胸膈不快
方宜與服無熱
與痰亦可不下

審小兒得病之源

大喜後乳食多變驚癇

喜屬心大喜後乳食則傷心錢氏云心主驚驚是

癇也素問云暴

大飲後迎風多成暴厥

大飽則食氣上衝心肺之間未散卒被風冷所傷
故暴厥不醒如中風之狀脩真秘訣云熱食汗出
盪風發痙頭疼多腫

大驚後乳食嘔吐心痛

大驚後乳食則手少陰經受邪多成心痛抱扑子
云夾驚便食多成心痛心主驚故也大驚飲食氣
節不通或吐逆翻胃

大驚後飲水久成不語

心主驚驚後飲水則傷心心氣通于舌舌本無力
故不語也亦能成水痢癖實鑑云小兒水痢癖者
因飲水兒被驚則成也

當風乳食兒成吐嗽腹膨

倉公云小兒飲乳迎風風冷入肺則令咳嗽又經云形寒飲冷則傷肺肺傷則咳嗽肺主氣氣傷則腹脹

當風飲水成雀目青盲

素問云風氣通於肺當風飲水則水停於肝肝氣通於目故成青盲雀目也寶鑑云小兒飲水久停肝翳障全生辨物難夜裏不明為雀目青盲晝夕一般般

夜露下乳兒多成嘔吐

夜露下乳兒陰氣入咽冷乳不散多生嘔逆脩真秘訣云夜露食其上有邪氣

夜露下飲水多成洩瀉

素問云濕勝在內攻於脾胃脾胃受濕則水穀不分水穀不和故大腸傳道而乃注瀉也

正食便乳成疳黃口臭

王氏云正食便乳令兒口臭牙中血出通真子云

乳食並食令兒面黃口臭又能生痰癖巢氏云飲
乳食哺不能無痰癖

正汗便乳成心疳壯熱

葛洪云汗者心之液正汗便乳則傷其心心傷則
液散液散則皮膚苦燥成心疳壯熱錢氏云心疳
面黃臉赤身體壯熱脩真秘訣云大汗脫衣得偏
風半身不遂

食熱麤乳兒多成龜胸

聖惠方云小兒龜胸緣肺熱脹滿所生又乳母盜食五辛熱麪令兒龜胸也孫兆云母食五辛令兒龜胸

食酸鹹炙煨乳兒成渴

聖惠方云乳母盜食五辛多味酸鹹夜飧炙煨心胸停滯便即乳兒致臟腑生熱熱則燥煩致令渴不止也又兒食醬肉渴飲水則成渴痢

母醉卧當風乳兒失音

抱朴子云乳母飲酒過度當風取涼仰卧乳兒風冷酒毒氣亂之乳干入喉咽之間故令兒失音不語也

母飽便乳兒身熱喘急

孫氏云乳母大飽胸膈停滯氣息未調便即乳兒遂令身熱喘急怒傷陰暴喜傷陽孫真人云傷陰則瀉傷陽則驚

大喜後飲水多成喘息

喜後飲水則停於上膈令胸喘急通真子云喜後
飲水水傷于三焦令氣息喘急聖惠方云汗後飲
水必成喘也蓋喜屬心汗亦屬心故也

大哭後飲水多成嗽噎

哭屬肺大哭後飲水則氣道不通成痰嗽氣噎聖
惠方云飲水積結不散故成痰也又云肺水氣乘
之則多咳嗽也倉公云哭人飲成氣噎嘔吐咳嗽
痰水

大飢後乳食多成腹痛

飢後飲水則冷濕傷於脾脾氣受濕則冷腹痛素問云濕盛則瀉聖惠方云飲冷過多結在心下故令心腹滿痛也

大飽後飲水多成氣逆

素問云飲多則肺布葉故是氣逆而上奔故能生痰疾道書云飲食過多成痰癖氣逆養生云飲水莫急嚥久成氣病

萬全云醉飽傷勞便乳兒者多成癖病

飲水便乳積痰成驚風

寶鑑云飲水并傷乳為痰結在胸令兒上吐下瀉
與痢病實則身多熱虛則身多寒早須醫治如久
則變驚風脩真秘訣云渴飲過多則成痰癖

飲酒食肉乳兒成天吊

聖惠方云乳母食飲無常酒肉過度熱毒氣流入
乳中即便乳兒心肺生熱毒既盛風邪所傷則令

心神驚悸眼目反張壯熱不仁四肢抽掣故成天
吊

嗽後飲乳成乳驚喘噎痰

嗽者肺也嗽後飲乳痰聚不散氣道不利閔膈不
通閔膈不通則成痰噎痰噎即驚喘

嗽後飲水成鼻齕多涕

嗽主肺肺氣通於鼻嗽後飲水則傷於肺氣肺氣
受寒則鼻齕多涕寶鑑曰清涕出肺受寒

悲喜未定便乳成涎嗽

悲喜未定便乳兒者涎嗽引風此孟氏云小兒悲
喜未定便飲乳者則傷肝心風火交急則化成痰
嗽

悲喜未定飲水成吐血

悲喜未定氣血不和飲水則逆其氣氣逆則勝血
血隨氣行故令吐血萬全方云渴飲水多停心下
故令喘嗽甚則唾血

兒啼未定便乳生癭氣

聖惠方云兒啼未定以乳乳之令氣不得消散故結聚成癭氣也孟氏云兒啼未定肺竅開便即乳兒與氣相逆氣結停積多成癭癰

兒啼未定飲水成胸高

孟氏云兒啼未定飲水則痰結痰結則脹肺肺脹則胸高巢氏云痰者水飲停結胸膈之間故結成痰也又云再若為風冷所加即氣聚於肺肺脹則

腦高氣結急

拭浴未乾乳兒生瘡疥

寶鑑云小兒癰是母於風中浴後拭之未乾和水飲乳及夏月汗出而不收生瘡細星星是也修真秘訣云炊湯洗面無光彩作甌哇瘡

拭浴未乾飲水成頭疼

拭浴未乾便飲水者則內外傷冷故令身熱頭疼葛氏云濕體飲水則內外寒冷交攻遂發頭疼身

熱仙經曰炊湯洗浴則多成痺

喜乳涎喘生驚

孫兆云令兒上氣顛狂亦令兒生痰喘急或生驚
怒乳疝氣腹脹

千金翼云怒乳令兒疝氣扁鵲云女子則腹脹

寒乳妳片不化

華陀云乳氣寒虛冷故令便青而啼千金翼云令
兒咳嗽

熱乳面黃不食

千金翼云令兒嘔吐張氏云熱乳則傷肺氣令兒

龜胸

氣乳吐瀉腹脹

寶鑑云令兒面黃白乳哺減少腹脹滿

病乳能生諸疾

令兒黃瘦骨蒸盜汗啞煎夜哭孫氏云病乳則致虛

羸及生諸疾

壅乳吐逆生痰

靈秘云壅乳成痰涎涎壅生驚寶鑑云壅乳成如
癖又吐逆生痰

疝乳腹急臍冷

寶鑑云腹急而瀉腦皆熱夜啼肌瘦又有積塊

醉乳恍惚多驚

千金翼云令小兒熱腹急痛扁鵲云醉淫情亂兒
恍惚多驚

淫乳心發驚癇

寶鑑云乳母淫佚情亂乳兒令吐瀉身熱啼叫如
吐瀉不治即變驚故乳兒者不可不禁忌也凡
喜怒氣亂未定乳兒則成吐瀉腹痛疳黃不食寒
熱壅積不散兒即成痰癖涎嗽腹脹龜胸醉淫喘
乳多吐發驚癇聖惠方云醉淫喘乳能殺小兒聖
濟經論乳者夏不可熱熱則逆冬不可寒寒則咳痢
母不可怒怒則令上氣顛狂母不可醉醉則令身

熱腹滿母方吐下而乳則致虛羸母有積熱而乳則變黃不能食親房而乳則致瘦悴交脛不能行大抵母乳食不便則生疾病

病源歌

胎風腹痛

胎病變胎風胎驚變不同胎癰寒腹痛胎熱搐搦
內弔夜啼百日外多有此證

盤腸內弔軀身哭氣弔疼時曲臍腹每夜多啼直

至明胎中有毒腸間搖

盤腸內弔十歲上下多有此證

盤腸弔痛令兒哭氣刺攻衝聲漉漉臍上如蛇隱
見形發歇無時因積毒

只吐不瀉惡候

傷乳停胸膈生痰作吐頻不宜尿糞澁尤忌燥紅
唇

壅乳生吐惡候

孩兒何嘔逆壅乳為脾傷脾解腸因冷頻頻吐不
宜素問云食則嘔者物盛滿而上溢巢氏云小兒
嘔者乳哺冷熱不調則令停胸膈因乳哺前後相
觸氣不宜流故令兒吐嘔也

吐乳發搐惡候

吐乳頻頻必發驚脾虛困弱失精神精神既失涎
潮盛顛腫青筋不救因

嘔乳生涎

見乳非為涎結生甚可疑闕精防掣搐咽口必驚危
食停中脘急利大便

食停中脘內嘔逆氣難通不瀉時為痛生痰必引
風

嘔煎生驚

嘔煎無體熱風生五臟中面青因腹痛不爾變驚
風

呵欠生驚

呵欠若頻頻睛邪撮口唇雖然驚未發啼哭動心

神

搖頭生驚

搖頭頻擦面拘頸亦因風目助青鮮綻牽身掇若

弓

悲喜莫乳

悲喜令兒乳痰涎嗽不通停留胸膈上吐逆未生

風巢氏云小兒食乳因冷熱不調停積胸膈之間結而



成痰痰多則令飲不下吐痰沫變痰結癥壯熱痰
實壯熱不止則發驚癇

肺穴傷風

肺穴傷風冷痰涎喘嗽聲啞煎因有熱恍惚自然
驚

傷暖傷風

傷暖傷風冷令兒鼻不通乳多咽不利痰聚引驚
風

咳嗽因風

咳嗽因風肺受寒痰涎喘急眼難安時時發熱心煩躁臉赤唇紅口鼻乾鼻內流涕亦然錢氏云嗽而不吐痰熱在上焦甘草桔梗身熱嗽受邪重身涼受邪輕

胃冷欬逆治用香南散

咳逆寒生胃連聲最損人衛虛榮不順擗引痛頻頻肺冷傳於脾胃素問云噫巢氏云風冷傷於肺

鼻塞不通

邪客皮毛為中風致令鼻塞氣難通寒停顙戶流清涕息肉生成滿鼻中

鼻流清涕

鼻內流清涕元因肺感寒寒停傳腦戶鼻涕不曾乾喘臭聲嘔惡證

寒邪傷肺咽啼哭啞無聲氣結停胸膈痰涎喘自驚

驚喘痰噎

驚喘痰潮噎風驚又食傷蓋因三種作發熱體如
湯

驚痰壅滯

痰涎壅乳滯胸中膈節令兒氣不通嗽吐喘息急
急精神恍惚變驚風

驚後成癇

慢驚雖瘥後涎唾溢難收發歇成痰疾精神不自

由

驚後肢軟

慢驚雖瘥後神思一如痴不語因痰滯須防軟四肢

驚風不語惡候

驚風得病不能言只被風邪五臟綿涎滯肺心關氣道致令聲語不相連

癇病潮歇

癰來朴地口流涎嚼舌唇青眼鼻牽頭顫手搖痰
壅噎朝昏退息復依然

瘧病強直惡

強直反如弓神昏似中風涎流唇口動瘕瘕與癰
同

顛狂嗔喜

重陰相勝必為顛嗔喜無時面目鮮陽盛兩爭強
目作或歌或哭妄驚眠

傷寒驚狂

傷寒身發熱狂顛臉赤唇紅目又鮮氣促生涎多
渴燥眇睛牽動不能眠

傷寒結胸惡候

傷寒因下早腫痛結胸間痞悶時為喘皮膚作錦斑
時氣傳變仲景云寒毒藏于肌骨至春即發病

時氣因邪觸春秋及夏冬受邪肌肉內傷客衛榮
中頭痛渾身熱心煩兩頰紅鼻清涎嗽嚏傳變似

傷風

夜熱日涼

夜熱身如火才明依舊涼非於邪氣作蓋為客風
傷痺熱尿多赤脾蒸糞帶黃汗來方始退肌體漸
羸尪

頭熱身涼六傷合

頭熱却身涼陰虧不順陽陰沉陽不降病作必為
殃

頭疼頭熱同前法

諸病傷腦尸熱痛只攻頭陰被陽相隔衛行榮不
流

身熱發厥久瀉利多此虛熱

氣熱多發厥血虛瀉作熱氣血若俱虛身熱手足
厥

久熱筋疼

久熱傷筋骨伸舒痛苦風亦能成軟弱血氣不能通

久熱頭暈

久熱主頭暈心虛卧不寧骨蒸微有汗憔悴減形
容

風熱相競驅風膏宣風散

風熱互相競風攣不自由疼牽腰脊曲痛引熱攻
頭

掩面驚哭祛風膏琥珀散

掩面藏頭哭心虛怕見人驚潮肝腎作戛齒及牽

唇

伏熱生驚

伏熱生涎燥多嗔見食悲向明曾不樂入暗稍相
宜或即鮮雙目無時腫四肢渴煩尋冷地暑毒作
驚危

中暑似驚惡候

暑伏傷心壯若驚頭疼熱渴燥無聲昏沉喘噎涎
無汗手足掣抽眼關睛

傷寒鼻衄

傷寒何鼻衄蓋為熱傳心合汗應無汗陽邪氣受身

吐血氣逆

血虛氣盛不和同熱毒流心引肺風忽爾氣虛榮衛逆吐出鮮明點點紅

痰中有血

咳嗽痰中忽有紅風傷氣血不和同痰中濃血因頻

嗽脉損聲粗必引紅

大便下血

風冷傷痼有熱攻交相繫作糞瀕紅痢傷臟腑令

便血

錢氏云筋痺傷血而瘦姚氏云痺傷心肺腸中血

濕暑兼停在胃中

古書云腸中無溫毒血下如赤豆汁

血淋尿血

久熱膀胱內脬中積聚成小便時下血澁少痛肝

心

熱淋血澁

三焦因有熱熱聚入膀胱結澁陰中痛淋瀝渥色黃

石淋沙石

膀胱并腎熱少尿脬中結似石或如沙澁痛難沉瀉

氣淋頻澁

寒氣膀胱內尿難澁又頻腎虛脬受冷尿道不藏

精

寒淋如膏

淋瀝脂膏水脬寒腎氣虛若頻清夜耗白濁又難

除

尿泉不止

尿泉頻不止脬內不收藏冷滑溺難禁亡津耗小

腸

脬囊疼通

脬轉尿時疼尿時却似常非干淋瀝病氣壅結脬胱遺溺

膀胱因受冷夜卧必尿床久則遺便溺淋瀝滑小腸

疳蝕女陰有疳深者自然生虫亦用董法

疳蝕陰中腫浸淫漸作瘡白膿如帶下久耗即痿黃香蟾九加附子龍骨各半兩外用蟾酥膏傅之蟲攻下部

痢回攻下部侵蝕至肛門痒痛蟲來嘔痢深病在

根

栗房散遣蟲
丸又有薑法

肛腸脫出

肛腸頻自下因利滑難收秋後經時日令腸痛不
休

臍濕生瘡

臍濕成瘡腫風傷冷氣攻腹膨脹作痛荏苒必生風

尿難糞結

結熱在腸中尿難糞不通外加身壯熱內必引驚風

大小便澀四順散八正散

氣壅生風熱大便秘澀小水澀難通頃刻成驚掣

吐瀉因暑

吐瀉因傷暑腸鳴痢色黃

扁鵲云傷暑吐泄瀉腸鳴便黃水久則青白干

金云寒則腸中鳴泄瀉腸滿痛千金方云腸虛則如雷鳴泄青白痢食不化腹臍痛渴多煩

不食尿少熱如湯困頓精神慢嘔煎意思長氣粗
頻腹痛面色減精光

痢脾泄瀉

小兒泄瀉精神少久患脾虛食不聞碧綠眼睛生
白膜青黃面臉見紅筋有時揉鼻擗眉額或即擗
唇擦齒齲渴飲停留脾受濕致令水穀不能分

痢瀉進退

痢瀉膨臍腹肌膚日漸衰脾虛難化食腸滑又經

時糞雜腥多臭頭垂冷四肢唇紅因渴熱進退極難醫

痢雜色

大便膿血色青黃久患成痢必滑腸下部脫肛情倦怠上焦煩渴意悽惶疼來冷熱相干作因為寒溫理失常體熱須宜多進食豈愁憔悴少精光

糞中雜色

糞雜元因積醱酸是食驚傷深青澱沫痢白臭非

常

五臟糞色

肝冷傳脾肺綠青焦黃脾熱土之形肺腸寒積膿
粘白赤黑因心腎熱成

驚肝相傳

驚病蕪痺病相傳心與脾滋煎多啼哭憔悴漸疳
羸驚熱便黃沫痺寒尿白脂睡中眠不穩遍體有
瘡瘕

驚痺食傷

作瀉不甚瀉或吐或不吐乍熱乍溫涼多噦多喜
怒小水澀難通大便物不聚驚痺與食傷啗煎煎
乳食

乳食頻傷

乳食若頻傷為痰亦為積吐出臭酸酸瀉多惡氣
息腹痛腹膨瘦黃痺瘦脊或倦或啗煎不眠不

安跡

柴九子下
益黃散

食物不化

食物難消化脾間有積停腸疼須作瀉進退不安寧

堅積癖塊

堅積癖塊有多端元因乳食聚脾疳或積橫臍連

腹痛無時隱見脇間安

療癥核塊

療癥本因肝連珠核數般項邊筋結塊膿潰卒難

安

面覆地睡

傷暑傷疢食心煩覆地眠腹膨疼渴燥吐與瀉相

連

腹大非飽嗜食不知飢飽不生肌肉腹大便秘洩腸胃不守故也因飢傷飽苦參丸

因飢傷太飽氣脹腹膨脬渴汗疢黃熱眩煎不喜行
虛實腹脹

腹脹皆因食氣傳虛而喘滿瀉相連朝寬暮急須

為實虛脹宜溫實可宣

寒熱因積

壯熱來時又却寒皮膚燥澀髮毛乾非干神鬼為邪崇取下脾間積始安

冷熱為瘧

寒熱往來頻傷脾是病因連朝勞血氣逐日損精神頭面生瘡四順散

五臟不和同六腑氣難通瘡癰生頭面流傳必至

癰

血熱生瘡

血熱生瘡疥膿窩綻若珠痒時搔不已痛過腫皮
膚

腮腫咽痛

腮腫喉中痛咽乾噉物難有痰風熱作涎喘不安
寧

風疹火丹四順散

熱盛生風疹忽然發遍身火丹身赤腫疼痛亦驚人
膿耳成聾

腦戶停風熱熏蒸耳作膿腫疼因熱聚氣聚亦成

聾

用白礬火燒通赤如桃
花色入麝香納耳中

心疳臉赤

心疳臉赤少精光壯熱唇紅面色黃才卧皮膚流

盜汗睡中驚哭意悽惶

肝疳白膜

肝疳白膜眼中瞞怕日羞明泪不乾咬齒搖頭肌
體瘦腹中堅癖塊多端

脾疳腹脹

脾疳腹脹體萎黃食物難消又滑腸揉鼻揉眉多
受吐蛔虫和糞瀉非常

肺疳咳嗽

肺疳咳嗽體尪羸喘急痰涎氣力衰疥癬皮膚生
瘙癢頻頻吃食只嫌飢

腎痺骨熱

腎痺骨熱生偏墜齒黑唇焦瘡匿鼻憎寒壯熱手
如冰每夜呿煎不穩睡

時時吐唾

時時頻吐唾腎氣冷之因日漸亡津液萎黃作瘦

人

地黃丸
加附子

偏墜腫硬

陰核腫如炊兒啼怒氣為因疳積作痛或被暑邪侵

傳注膀胱內侵陵外腎垂停留堅硬大結聚一邊生
疳熱肢冷

渾身熱似火手足冷如冰腹大時加渴皮膚盜汗
蒸寶鑑云渾身似火渴飲水以無時手足如冰氣攻心而又至

骨熱膚燥

骨熱皮膚燥時時盜汗多又能津液竭血氣不安和
疳眼羞明

疳眼最羞明才開淚又傾心肝俱積熱膜翳遮白睛

雀目青盲

雀目氣薰肝黃昏見物難睛雖無翳膜內障若雲

幔

盜汗如珠

才睡汗如珠夜多日晝無亡津添骨熱面色燥皮

膚

渴變成腫

渴頻因久瀉脾胃久亡津水飲無乾舌咽焦又燥唇

眉攢多困倦髮豎少精神在再經時日成虛遍腫身

脾冷流涎

脾冷流涎唾經云是滯頤不宜頰下濕濕久損傷

皮

乾薑白朮為丸小豆
大三十九米湯下

疳腫明亮

虛黃如熟李疳水定無疑聚氣膀胱內陰囊腫若

吹

風腫多痒

體腫時時痒風邪客肺脾搔之成痞癰痰熱盛相
為

氣腫因嗽

久嗽身浮腫因勞肺氣為痰停胸膈滿涎喘不相

宜

積腫悞脾

因食悞傷脾肌膚腫若吹腹膨多氣促暴腫積無

疑

虛腫煩渴惡候

久痢損傷脾胃虛腫四肢渴煩多畏食臍凸滿將危
痘毒停留

豆毒停留熱有餘疏傳臟腑結癰疽攻脾瀉利腸
中滑衝肺痰涎嗽轉虛侵腎耳疼膿易聚薰肝眼
痛翳難除心經苦也邪干犯驚哭精神不自居

痘毒生熱

痘毒多生熱攻衝氣血虛薰肝睛上瞤入肺嗽難除

傳腎瘡猶累傳脾腫有餘傳心驚恍惚眠卧不能舒
痘後結癰

痘後結癰疽肌膚熱未除瘡癰重再出膿胞起如
初啗煎無歡意驚眠不自如腸疼元有積毒氣腸
中居

痘毒攻肝

痘毒攻肝膽羞明眼澁昏赤筋生息肉白翳結癰
痕

瘡痘如珠

瘡痘如珠綻肥紅正得宜癰焦須解利有熱速涼之

痘毒未盡

痘毒熱未盡瘡癰再出癰身涼重發熱癰重必為殃
痘毒發驚惡候氣實者可治

痘後驚來逆瘡前搐亦危吐痰真可畏哽氣不相宜

痘後牙疳

痘後亡津液生疳食齒齲侵唇連口鼻損肉又傷筋
瘡後肚疼

發熱腹中痛斑痧腹中攻出多防不透出少更防癰
瘡痘逆候不治

吐瀉斑瘡逆便難疹亦為黯瘡因走氣厭豆血之衰
瘡痘變證不治

嚙物時時噎喉中搶錯聲喘痰頭有汗腹脹氣虛鳴
瘡痘便難

痘毒熱交咬尿難糞不通數朝須鼻衄或瀉若腸風
瘡痘青黑不治

瘡痘欲出先青黑半在皮膚帶紫色昏沉默默又
增寒困頓冥冥都不食心煩涎盛瀉膿頻體熱喘
粗癰腫極渴吐戛牙時顫發毒結咽喉聲啞塞

湯氏惡候形證歌

孩兒形候細消詳背母搖頭各一相鼻額汗珠魚口呿手
挈胸膈命遭殃白睛灌入瞳人裏四肢重蹯痛聲強五

硬五乾并五軟下痢頻頻亦不良顙門腫起難醫
療忽作鴉聲便即亡小兒形證卒難別滿口頑涎喉
中噎吐瀉無時加咳嗽身體皮膚色無血汗出如油頭
抑後眼青鼻黑無光潔浮胸心凸兼撮口足面直垂冷
如鉄搐搦睛斜連唇口渾身搖頭難捉拽舌黑如墨喘
又逆飲水百杯猶未歇啼哭無淚鴉聲出喉次之間
痰壅塞此疾誠難治療之免被時人道醫殺肝風搖
頭諸家古今方不載

不治候歌

全生方云一病未已一病復生五行相勝相尅其人必死

顙腫或陷

初生小孩嬰惟怕顙門開胎風憂顙腫顙陷亦多災

腹脹內吊

初生小嬰孩腹脹目瞪開內吊疼難止驚風搐再來

青點口噤

初生小兒孩着噤口難開臍內流鮮血肌膚碧似苔

重舌無聲

嬰孩患重舌啼叫哭無聲面色頗更變驚疼命必傾
弄舌生驚

弄舌驚之極牽睛引皺眉涎流空嘆氣唇撮口如吹
顚門低陷

顚陷形容瘦頗傷乳所為瀉青黃白水嘔吐困難醫
顚門開大

顚大頭成縫胎中母氣衰父精困不足肢體致虛羸
顚門腫起

顛腫青筋露
噤煎又怕驚
吐涎并嘔乳
風引動雙睛

顛腫頭大

顛腫頭皮急
風攻腦縫開
縫開頭必大
筋緩頸難擡

咳嗽氣粗大
忌腹滿

百日孩兒嗽
涎鳴肺臟虛
喘粗心腹脹
咽哽命難

居
聖惠方云老人小兒熱而脹者死

胃熱身黃

胃熱遍身黃薰蒸體似湯瀉頻心腹脹亂噦定知

亡

客忤吐沫

入房喘息未定便乳兒者則成客忤殺小兒

客忤畏生人或衝鬼共神吐黃青白沫瀉綠黑紅

新白眼睛垂下唇青色變頻若傷淫喘乳爰痛命

遂巡

三虛卒中

乘年逢月失時和此是亡虛被鬼魔賊氣中心兒
暴死陰陽未絕免沉疴

孩兒發驚

孩子發驚時唇紅汗濕肌瞪睛雙直視體軀四肢
垂腹脹頻頻喘精神漸漸衰吐涎非易治爪甲黑
難醫

急驚握拳

急驚欲發先握拳蓋為胸中有毒涎陰錯陽差為

逆候男左女右搐瀕全目白唇紅應少睡口喎舌
捲更驚眠大忌腹高頭手汗神昏氣促豈能痊

啼哭無泪

啼哭無泪或無聲下氣時時又發驚齧齒粘痰魚
口動瞳人昏暗翳遮睛

發搐面白

發搐面白唇中黑滿身皮膚無血色汗出如油沾體
滑頑涎滿口喉中塞

驚風指黑

驚風指黑爪如烟手足多重軟似綿咬如多啼無
泪下暫時停息又捧纏

再發驚風

再發驚潮搐涎流臉目斜烏青連口鼻啼哭類如

鴉

面冷腮紅眼閉睛手青足點指如丁朝朝嘔吐時時瀉
日日啞前夜夜驚舌腫風涎牽据響唇焦氣喘水雞

鳴齒噤戛牙偏咬妳頻吹魚口作鴉聲

逆危衰脫

面白唇紅逆睛昏力困危驚風嫌有汗痢熱怕攢
眉吐瀉防咽噎痰涎忌氣痿顫低脾胃脫頸軟骨
筋衰

喘嗽變驚

粘痰作嗽發連綿喘急時時面臉鮮外被客風傷
肺穴內緣冷氣入喉咽看看拘頸雙眸直漸漸昏

身兩手牽口角流涎心肺脹鴉聲齟齬必難痊

感風氣喘

邪客脾肺感風濕忽然喘急氣難通睛斜汗出唇青逆尤忌痰涎滿腹中

虛陽生風

虛脫變虛風虛陽必上攻下焦陰氣盛中脘食難通

上熱下冷

虛陽上熱口生瘡下瀉頻頻為滑腸渴飲唇乾咽
若火四肢冷逆似冰霜

天柱骨倒

天柱骨倒為亡津所得元因吐瀉頻肝受賊風難
俯仰脾傷冷氣損精神頭垂頸軟身憔悴筋緩皮
寬項不伸面色痿黃胸腹脹渴多畏食命遂殛

歷驗不治

顛腫數日忽病不治或風攻顛門頭骨開解或時

面赤如酒色少時即愈必發驚不可治兒百日內
外發搐愈而必復作并愈後顛腫不可治病愈後
復作面黑神昏雖不吐瀉大便如常身熱口瘡嘔
煎兒自指口內者胸中有痰久必發驚

久痢不治

身熱膿青身熱血黯潮熱腹痛憎寒汗出頭熱足
冷壯熱手冷形羸頭軟睛昏赤脉眼澀白膜口臭
生痰面腫作喘舌頭紅黑口唇焦赤喉中鳴響膈

滿氣喘飢不能食渴欲思酒痢如血蠶或如癰膿
神昏項硬

雜色不治

青赤從眉入目者死青色連眉入耳者死青色如
斜目下者死青黑色入口鼻者死青黑色多遠口
鼻者死黑色從眉遠耳者死鼻上青色腹痛者死
鼻上白色諸血出者死耳目口鼻起黑或白色者
死汗不出出不止者死熱病不得汗者死

不治證

目赤脉貫瞳人胸腫及陷鼻朝黑魚口氣急吐虫不定
瀉不定精神耗大渴不定止之又渴吹鼻不噴病重
口乾不睡時氣唇上青黑點頰深赤如胭脂鼻開張
喘急不定

聽聲音驗病

驗五臟正聲

脾屬土應宮音

其聲緩大而漫

肺屬金商音

其聲促而清次于宮

肝屬木應角音

其聲悲而和次于商

心屬火應徵音

其聲雄而清次于角

腎屬水應羽音

其聲沉而細次于徵

亂聲音主病

聲雄而重大

主傷風身熱頭疼驚悸上焦熱

聲雄而實澀

主身熱大便不通及口瘡

聲悲而焦躁

主肝風拘急眠卧不安或恐悸

聲濁而沉重

主痺氣并耳聾

聲哭而不啼

主驚睡卧不安

聲哭而不哭

主腹中疼

聲促而躁急

主肺經感風邪咳嗽身熱

聲長而細小

主下利腹疼或大便下血

聲啞而不響

主肺熱久則虛

聲啞而輕顫

主久病發驚癇

聲短而微細

主小便澀

聲短而遲緩

主瀉痢且鳴

聲前促而後緩

主吐逆惡心不思飲

聲啞煎不定

主心煩躁眠卧不定

有小兒聲啞咳嗽眼目澀者是欲出瘡豆有瘡豆盛出或出後豆毒咽喉聲啞者死候也又有初生嬰孩兒患重舌啼聲不出者死

辯疑

一兒患陰癰其脉浮數洪弦是陰中之陽非真陽也
一兒患慢驚得脉浮數呼吸粗大是其絕證非陽面也

一兒患痘疹作熱非傷寒也但看耳後赤縷者是

一兒患身支張非驚也肺肝不足或投涼寒亦愈

一兒聞響即掣跳者非驚也乃肺肝不足身有未安

一熱在筋脉亦發搐非真搐也如或過劑變假為真

撮要

一凡兒在胞胎必須飲食有常起居自若使神全氣和

胎氣安生子必偉

一懷娠之後最忌食熱毒等物庶免孩兒生有臍突

瘡癰等患

一乳母常須養和血氣樂以忘憂使乳汁溫平縱兒疾作自安平過半矣

一兒平常無病不必服藥恐遇疾不即為効

一初生小兒必忌外客所觸庶免致客忤熱古人所以忌客

一兒孩不宜食肉大早傷及脾胃免致蟲積疳積
一兒孩變蒸作熱非謂其病不藥自愈

一小兒有病在腑有自愈者故先賢惟理其臟未言其腑腑陽臟陰如麻子一證乃是腑病

一小兒顙顙未合視為尋常

一兒生穀道無穿多至不救藥無速驗必假物透以通之
一兒風發搐手足不宜熱捉恐風癇逆入經絡廢害肢體
一小兒無容入神廟中恐神情閃爍必生怖畏

一小兒笑極與和樂睡思既濃母使咀嚼

一小兒患吐瀉女吐男瀉最為急證急宜療之

一小兒患瘡疹發驚不可下驚藥有熱不可用退熱藥
有汗不可止汗或吐不可理吐或下亦有可不可

論髮際穴

仁齋直指方論云小兒初誕收生者多於頭額前髮際
中間灸之蓋取其可以截風路也諸風篤證藥力不及
昏迷沉絕嘿然無聲於此灼艾每有扶危之功然亦
顧其善後之劑何如耳百會一穴在頂心端正旋毛間
亦濟危困者以是哉

灌藥服藥法

小兒煎藥以銀盞約水半盞藥多焉其或不能灌藥則以匙送下服藥未盡旋旋與之藥性溫熱乳食前服藥性寒涼乳食後少頃服和平之疾隨意無拘

論腦麝銀粉巴硝等不可輕用

仁齋直指方論云小兒驚風古人以其內外熱熾風氣暴烈而無所泄故用腦麝麻黃以通其閉竅銀粉巴硝以下其痰熱蓋不得已而用之其實為風熱盛實者設

也世俗無見不權輕重每見發熱發搐輒用腦麝蟾酥
鉛霜水銀輕粉巴豆芒硝等劑視之以為常惟其不當
用而輕用或當用而過用之是以急驚轉為慢驚吐瀉
胃虛荏苒時月驚風之所謂難療者正在此也萬一
發熱驚搐本為傷風傷寒傷食瘡痘而作誤藥至此其
為害豈淺淺哉以理觀之能用細辛羌活青皮乾薑荆
芥之類以為發散如腦麝能用獨活柴胡山梔枳殼大
黃之類以為通利勝如銀粉膏硝殼或當用酌量可與

不可無之亦須酌量勿可過劑幼書謂瀉青丸導赤散乃醫用之上藥蜈蚣有毒惟風氣暴烈者可以當之然其風氣暴烈非蜈蚣能截擒亦不自止但用之貴乎藥病相當弗容固執或半字或一字或桐子半九或桐子一丸尤在酌量而作劑也設或過焉當以蚯蚓桑皮為解解巴豆毒以龍腦薄荷汁調沙糖服或巴焦根汁服凡幼兒欲發驚風先神志不定恍惚悸人搭眼上視左顧右盼伸手握拳悶鬱拿氣情態不若尋常如此

者有驚即散驚有熱即退熱壅實即去壅實退熱則不生痰熱全未有風癇搐搦顫引之狀則只與退熱化痰如參蘇飲之類可也謹勿妄投通利勝等劑惡或透其熱流入絡及成風此又小兒無病不可服藥之戒世俗玩習以為小兒體熱或遇澡浴即與久坐湯水之中風冷外傷水濕內滲頃刻間遽成風搐或惡呌頻吐驚散則不生風壅滯通則氣得其平病無由作是故當以小劑治之若夫患在或昏迷失音或洞泄或已勢如暴風

疾雨難以支吾不可不戒

小兒四時用藥

拔粹


假令春分前風寒也宜用地黃當歸羌活防風或地黃丸瀉青丸相間服是也春分後風熱也羌活防風黃芩或瀉青丸用導赤散下之立夏之後宜三黃丸導赤散夏至後溫熱也導赤散瀉黃散合而服之或黃芩甘草白朮茯苓之類為勝濕去熱也立秋後宜益黃散陳皮厚朴人參木香之類是也秋分之後地黃丸主之謂腎

下受瀉也

新生兒戒火

嘗有北人居于南方新生小兒多與灸顙其害非淺古
書云河洛土地寒多兒生三日灸顙以防驚今者東南
地土多溫新生牙兒無病不宜逆灸聖濟經云前世之
書執小兒論者不知南北之異而專於灸熇大抵察其
地寒溫虛實 仁齋直指方論云小兒初誕收生者多
於頭額前髮際中間灸之蓋取其可以截風路也諸風

篤證藥力不及昏迷沉絕嘿然無聲於此灼艾每有
扶危之功然亦顧其善後之劑何如耳百會頃石頂心
端正旋毛間亦濟危困者以是哉



普濟方卷三百五十九